



UKA 2025/171 – UKA 2025/172

16/10-2025

Justus Hansen

Meeqqat 18-inik ukioqalernissami tungaanut pisortat ingerlataannik angalatitsiviit aqutugalugit angalasussaattillutik meeqqatut akeqalernissaat, aningaasatigut qanoq naleqassanersoq Naalakkersuisut misissuinnissaannik Inatsisartut aalajangiiffigisassatut siunnersuut. Misissuineq meeqqat akikinnermik angalasarnerannut malittarisassat allanngortinnissaannik tunngaviliissaaq, kingusinnerpaammilu UPA2026-mi inatsisartunut saqqummiunneqassalluni.

(Inatsisartunut ilaasortaq Jens NapätôK, Naleraq)

(Siullermeerneqarnera)

Soraarninngornikut pisortat ingerlataannik angalatitsiviit aqutugalugit akikinnerusumik angalasinnaanerit ukioq naallugu atuutilerpat aammalu soraarnerussutisiaqartunut billetsit ukioq kaajallallugu killeganngitsumik pisiassaasinnaalerpata, soraarnerussutisiaqartut akikinnerusumik angalasarnerannut malittarisassat allanngortinnissaat siunertaralugu, qanoq naleqassanersoq Naalakkersuisut misissuinnissaannik Inatsisartut aalajangiiffigisassatut siunnersuut. Misissuineq kingusinnerpaamik UPA2026-mi inatsisartunut saqqummiunneqassaaq.

(Inatsisartunut ilaasortaq Jens NapätôK, Naleraq)

(Siullermeerneqarnera)

Qujanaq Inatsisartunut ilaasortaq Jens NapätôK siunnersuutitut, Demokraatiniit tigulluakkatsinnut.

Demokraatiniit pingaarnarpaavoq, meeqqat utoqqaallu pitsaasumik atugaqarnissaat. Meeqqat periarfissaqassapput nunatta misigisaqarfiginnissannut, ilaqqutanik naapitsinissamik piffinnillu nutaanik takunninnissamik. Nunatsinnut kulturitsinnullu paasinnittariaariannut annertusaataassaaq. Utoqqartagut inuunermi sivilisuumi inuiaqatigiinnut tapertaasimapput, naleqqutiinnarporlu, ilaqqutaminnik ikinngutiminnillu kiffaanngissuseqarlutik tikeraarlutik nuannisarsinnaanissaat akinik qaffasissunik killilersorneqaratik.

Ilisimavarput, ilaqtariippassuit meerartallit aammalu soraarninngornikut aningaasakillioortut. Billetsit akii taama qaffasitsigitillugit, angalanerit ingerlaannaq inuulluarniutinngortarput, amerlanerpaat akissaqartinngisaat. Tamanna naligiinnginnermik ungasissutsimillu pilersitsisarpoq – sumiinneq pissutaaginnarani, aammali inuttut atugarisat. Tunngaviummik isumaqarpugut, angalanerit tamanit akilerneqarsinnaasuusariaqartut.

Taamaattumik akikillinnissamik eqqarsarnek taparserparput, meeqqanut soraarninngortunullu angalanermut akikillisaataassammata. Nunami ataqatigiinnerulersitsinnermut aningaasaliinertut isigaarput, inuunerissaarnerulernermut ataatsimuussusermullu annertusaqataasussaaq. Akikillisaatit aningaasartuutaannaanngillat, aammali nunami, isorartuumi, angallannermillu isumalluuteqartumi,



sakkussaallutik tamanut assigiimmik periarfissiinissamut.

Demokraatit isumaqarput, toraagalimmik suliniutigisariaqartoq pissakinnernut akinik nikeranngitsunik akilernerqarsinnaasunillu pilersitsinissaq. Taperserparput, sukumiisumik misissuisoqarnissaaq, qanoq akikillisaatit ilusilersorneqarsinnaanersut, innuttaasunut pitsaasumik kinguneqassappata.

Uagutsinnut pingaartuuvoq, akikillisaatit aalajangersimasuunissaat angalanermullu politikkimi siunissami akuutinneqarnissaat, taamaasillutik ilaqutariit meerartallit soraarninngornikullu suliniutaagallartuinnarnik imaluunniit nikerartunik aningaasaliinernik nalaataqannginniassammata. Aaqqissuussaq paasinartuussaaq, tatiginartuulluni aammalu naatsorsuutigineqarsinnaasuulluni.

Demokraatinut una nunami ataqatigiinnerulersitsinermut, tulluartutut aammalu ataqqinninnertut, inunnut nunatsinnit ilusilersuisimasunut tunngassuteqarpoq. Aammalu taakkununga, ingerlateqqiisussanut.

Taamatut oqaaseqaateqarluta siunnersuutit Sanaartornermut ataatsimiititaliami suliareqqinneqartussatut innersuussutigaaqut.